

VENDIM
Nr.54, datë 31.1.2007

PËR NGRITJEN DHE FUNKSIONIMIN E NJËSISË AD HOC, PËR SHQYRTIMIN E DOSJEVE TË PRAPAMBETURA TË KOMISIONIT QENDROR TË STATUSIT TË DËSHMORËVE TË ATDHEUT, SI DHE PËR NGARKIMIN E INSTITUTIT TË SIGURIMEVE SHOQËRORE, PËR NDJEKJEN DHE ZBATIMIN E PLOTËSIMIT TË KRITEREVE, PËR PËRFITIMIN E SHPËRBLIMIT NGA FAMILJARËT E DËSHMORËVE

Në mbështetje të nenit 100 të Kushtetutës dhe të nenit 4 të ligjit nr.8607, datë 27.4.2000 “Për statusin e Dëshmorit të Atdheut”, të ndryshuar, me propozimin e zëvendëskryeministrit, Këshilli i Ministrave

VENDOSI:

1. Ngritjen dhe funksionimin e njësisë *ad-hoc*, si staf i përkohshëm teknik, për shqyrtimin e, gjithsej, 491 dosjeve, në pritje në Komisionin Qendror të Statusit të Dëshmorëve të Atdheut. Këto dosje duhet të jenë regjistruar deri më datë 31.12.2006.

2. Njësia *ad-hoc* përbëhet nga 5 anëtarë, me profesion juristë, si më poshtë vijon:

a) Drejtori i Drejtorisë së Kontrollit të Brendshëm Administrativ dhe Antikorrupsion, në Këshillin e Ministrave;

b) Këshilltari ligjor i zëvendëskryeministrit;

c) Një përfaqësues nga Kontrolli i Lartë i Shtetit;

ç) Një përfaqësues nga Ministria e Mbrojtjes, me minimumin 5 vjet përvojë pune si jurist;

d) një përfaqësues nga Ministria e Brendshme, me minimumi 5 vjet përvojë pune si jurist.

3. Ministri i Brendshme dhe Ministri i Mbrojtjes të caktojnë përfaqësues të tyre persona, që, për shkak të funksionit, kanë akses në arkivat e këtyre ministrive, për verifikimin e informacioneve, të të dhënave zyrtare apo provave të paraqitura në dosje, sipas afateve të përcaktuara në mbledhjet e radhës së njësisë.

4. Njësia *ad-hoc*, pasi të ketë përfunduar shqyrtimin, duhet të përgatisë, për çdo dosje, një relacion ligjor, mbështetur vetëm në prova të plota, që provojnë ose rrëzojnë njërin nga ngjarjet e përcaktuara në nenin 2, shkronjat nga “a”-“ë” të ligjit nr.8607, datë 27.4.2000 “Për statusin e Dëshmorit të Atdheut”, të ndryshuar, dhe të drejta të tjera të ligjshme, të lidhura me to. Ky relacion duhet të përmbajë:

a) kërkesën për shpalljen ose njohjen “Dëshmor i Atdheut” apo të drejta të tjera të ligjshme të lidhura me to;

b) Mbështetjen në prova dhe të ligj;

c) Arsyetimin ligjor;

ç) Rekomandimin përfundimtar, për pranimin apo refuzimin e kërkesës.

Çdo anëtar ka përgjegjësi të drejtpërdrejtë për përmbajtjen e këtij relacioni dhe e nënshkruan atë. Anëtari, që është kundër arsyetimit të shumicës, evidenton, me shkrim, qëndrimin, në mënyrë specifike dhe të argumentuar. Mendimi i pakicës është pjesë e relacionit, që i paraqitet komisionit.

Njësia *ad-hoc*, brenda 45 ditëve nga hyrja në fuqi e këtij vendimi, përfundon detyrën e caktuar.

Kryetari i Komisionit Qendror të Statusit të Dëshmorëve të Atdheut cakton njërin nga anëtarët për ndjekjen e procedurave, për përgatitjen e rendit të ditës, shpërndarjen e tij dhe të materialeve anëtarëve, si dhe për ndjekjen e procesit të nënshkrimit të vendimeve.

Një kopje e vendimeve u dërgohet, sipas ligjit, të interesuarve dhe institucioneve përgjegjëse, për zbatimin e të drejtave civile, nëse ka.

5. Njësia *ad-hoc* e ushtron veprimtarinë në mjediset e kryeministrit, pa kufizim dite dhe

orari zyrtar.

6. Ngarkohet Ministria e Mbrojtjes, që, brenda 3 ditëve nga hyrja në fuqi e këtij vendimi, të dorëzojë, me procesverbal, në protokollin e Kryeministrit 491 dosjet e regjistruara në Komisionin Qendror të Dëshmorëve të Atdheut para datës 31.12.2006. Çdo dosje duhet të shoqërohet me listën e dokumenteve përkatëse.

7. Ngarkohen përfaqësuesi i Ministrisë së Mbrojtjes dhe protokolli i Kryeministrit, që, pas përfundimit të shqyrtimit nga Komisioni Qendror i Dëshmorëve të Atdheut të të gjitha dosjeve, të bëjnë dorëzimin, me procesverbal, në arkivin e Ministrisë së Mbrojtjes.

8. Veprimtaria e njësisë ad-hoc përfundon pas shqyrtimit të të gjitha dosjeve të prapambetura dhe pritje në Komisionin Qendror të Statusit të Dëshmorëve të Atdheut.

9. Dispozitat për përgjegjësinë e stafit teknik, të përcaktuara në vendimin nr.151, datë 25.4.2002 të Këshillit të Ministrave “Për statusin e Dëshmorit të Atdheut”, zbatohen nga stafi i përkohshëm, për aq sa ato nuk bien në kundërshtim me këtë vendim.

10. Ngarkohet Instituti i Sigurimeve Shoqërore, që, brenda 30 ditëve nga hyrja në fuqi e këtij vendimi, të kryejë verifikimin e dokumenteve të të gjitha dosjeve, që administron ky Institut, për pagesën e familjarëve të Dëshmorëve të Atdheut dhe, në varësi të rezultatit, të kryejë vazhdimin apo ndërprerjen e menjëhershme të kësaj pagese, në përputhje me nenin 6 të ligjit nr.9650, datë 27.11.2006.

11. Instituti i Sigurimeve Shoqërore, 45 ditë pas afatit të përcaktuar në pikën 10 të këtij vendimi, të vazhdojë pagesën, për të gjithë familjarët, të cilët nga verifikimi i dokumentacionit në dosje, rezultojnë se përmbushin kriteret e nenit 14 të ligjit nr.8607, datë 27.4.2000 “Për statusin e Dëshmorit të Atdheut”, kërkon njoftim zyrtar nga zyra përgjegjëse e gjendjes civile e vendbanimit të familjarit, për përbërësit aktualë të gjendjes civile të familjarëve. Në varësi të dokumentacionit të lëshuar nga zyra e gjendjes civile, Instituti kryen vazhdimin apo ndalimin e menjëhershëm të pagesës.

Kur zyra e gjendjes civile vëren, sipas regjistrit, se familjari ka transferuar regjistrin në territorin e një njësie tjetër vendore, ai transferon drejtpërdrejt, kërkesën përkatëse në njësinë përgjegjëse, duke i përcjellë një kopje të njoftimit të transferimit, sipas regjistrit, edhe ISSH-së. Zyrat e gjendjes civile duhet t’i dërgojnë dokumentet brenda 15 ditëve nga data e mbërritjes së kërkesës.

12. Ngarkohen zëvendëskryeministri, Ministri i Mbrojtjes, Ministri i Brendshëm, Ministri i Financave dhe drejtori i Institutit të Sigurimeve Shoqërore për zbatimin e këtij vendimi.

Ky vendim hyjnë në fuqi menjëherë.

KRYEMINISTRI
Sali Berisha